

## CONVÈNI DE COOPERACION ENTRE ER AJUNTAMENT DE VIELHA E MIJARAN E ERA ENTITAT MUNICIPAL DESCENTRALIZADA DE GAUSAC

Vielha, 18 de junhsèga de 2019

### AMASSADI

D'ua part,

Eth Sr. Juan Antonio Serrano Iglesias, Alcalde der Ajuntament de Vielha e Mijaran, en tot actuar en nòm e representacion deth madeish, en ús des facultats que l'autreje er article 53 deth Decrèt legislatiu 2/2003, de 28 d'abriu, peth quau s'apròve eth Tèxte rehonut dera Lei Municipau e de Regim Locau de Catalunya, e facultat exprèssament entad aquest acte mejançant acòrd dera Junta de Govèrn Locau en session de data 9 de junhsèga de 2019.

Der auta part,

Eth Sr. Jesús Ordóñez Jaquet, President dera EMD de Gausac, en tot actuar en nòm e representacion dera madeisha.

Andús assistidi pera Secretària Municipau Sra. \_\_\_\_\_, era quau da fe der acte.

### EXPAUSEN

1.- D'acòrd damb çò qu'establís er article 82 deth Decrèt Legislatiu 2/2003, de 28 d'abriu, peth quau s'apròve eth Tèxte rehonut dera Lei Municipau e de Regim Locau de Catalunya, son competències des Entitats Municipaus Descentralizades:

- a) Era vigilància des bens d'usatge public e des comunaus.
- b) Era conservacion e administracion deth sòn patrimòni, includit eth forestau, e era regulacion deth profitament des sòns bens comunaus.
- c) Er enlumenat public e era neteja viària.
- d) Era execucion d'òbres e era prestacion de servicis de competència municipau d'interès exclusiu dera entitat, que non son a cargue deth municipi respectiu o dera comarca.
- e) Era ordenacion deth trànsit de veïculs e de persones en sòn àmbit.
- f) Era conservacion e eth manteniment des parcs e jardins e deth patrimòni istoric e artistic deth sòn àmbit.
- g) Es activitats culturaus e esportiues directament vinculades ara entitat.

D'aguestes competències nomentades mès ensús:

- Era vigilància des bens d'usatge public e des comunaus;
- Er enlumenat public e era neteja viària;
- Era ordenacion deth trànsit de veïculs e de persones en sòn àmbit;

les execute er Ajuntament de Vielha e Mijaran.

2.- Er article 83.5 deth Decrèt Legislatiu 2/2003, de 28 d'abriu, peth quau s'apròve eth Tèxte rehonut dera Lei Municipau e de Regim Locau de Catalunya, establís qu'era entitat municipau descentralizada a de contribuïr as cargues generaus deth municipi ena forma e proporcion que determine era legislacion de finances locals, sense perjudici dera participacion dera entitat enes ingrèssi der ajuntament.

3.- Bèra ua d'aguestes competències abantes relacionades les ven finançant er Ajuntament de Vielha e Mijaran, coma ei er enlumenat public e era neteja viària, era ordenacion deth trànsit de veïculs e era conservacion e eth manteniment des zònes verdes publiques.

4.- Qu'entara financiacion dera rèsta de competències era Entitat Municipau Descentralizada de Gausac non dispause de suficients recorsi pròpris.

5.- Qu'er Ajuntament de Vielha e Mijaran desire cooperar ena financiacion deth pressupòst der exercici der an 2019 damb era aportacion de recorsi municipaus.

Auent en compde çò que ditz er article 144 c) del Decrèt Legislatiu 2/2003, de 28 d'abriu, peth quau s'apròve eth Tèxte rehonut dera Lei Municipau e de Regim Locau de Catalunya, es parts formalizen eth present Convèni cossent damb es següentes

## CLAUSULES

### **Prumèra.-** Objècte

Aguest convèni a per objècte definir eth marc de cooperacion entre er Ajuntament de Vielha e Mijaran e era EMD de Gausac entara participacion dera entitat enes ingrèssi der Ajuntament.

### **Dusau.-** Naturalesa

Eth present convèni de cooperacion a naturalesa administratiua e regís ena sua interpretacion e desenvolopament er ordenament juridic administratiu, damb expressa somission des parts ara jurisdiccion contenciosa-administratiua.

### **Tresau.-** Compromisi e obligacions dera EMD

Era EMD de Gausac se compromet a qu'era aportacion recebuda der Ajuntament de Vielha e Mijaran non serà utilizada entà finançar cap tipe de despena que provengue dera celebracion de hèstes populars.

A mès a mès des obligacions fixades pera normativa d'aplicacion, era EMD de Gausac se compromet a aportar tota era documentacion que li sigue requerida per Ajuntament de Vielha e Mijaran entara comprobacion e contròtle financer des actuacions realizades, cossent damb era article 14.c) dera Lei 38/2003 Generau de Subvencions, de 17 de noveme.

Entà auer controlat er estat des vies publiques ena sason d'iuèrn era EMD se compromet a autorizar era colocacion de cameres web que poderan facilitar as empleats publics encargadi deth servici dera neteja de nheu, era informacion que sigue de besonh a trauès d'internet.

**Quatau.-** Compromisi e obligacions der Ajuntament de Vielha e Mijaran

Er Ajuntament de Vielha e Mijaran, cossent damb era finauietat expausada enes clausules anteriores, liràra ara EMD de Gausac era quantitat de 34.442,72€ (trenta-quate mil quate-cents quaranta-dus éuros damb setanta-dus cèntims) damb cargue ara partida 2019-1-94200-46800-01 deth pressupòst municipau.

**Cincau.-** Protocòus addicionaus

Totes aqueres qüestions que se poguen plantejar en un futur e que non agen estat previstes en convèni, atau coma d'auti espèctes concrèts que se poguen plantejar en relacion demb aguest convèni de cooperacion se determinaràn enes corresponents protocòus addicionaus a soscríuer pes parts.

**Siesau.-** Vigència

Eth present convèni entrarà en vigor eth dia dera sua signatura e sonque aurà vigència entar exercici de 2019.

**Setau.-** Es parts signatàries d'aguest convèni s'obliguen a dar compliment ara Lei 19/2014, de 29 de deseme, de transparéncia, accés ara informacion publica e bon govèrn enes tèrmes en que li siguen aplicables.

**Ueital.-** Interpretacion e causes de resolucion

En cas de què quauqua des parts, dauant d'ua circumstància non prevista, considerèsse de besonh introdusir bèra modificacion en aquerò que s'a convengut, ac meterà en coneishement immediatament dera auta part entà establir d'acòrd mutuau era solucion mès adienta.

Seràn causes de resolucion d'aguest convèni es següents:

- Er acòrd mutuau des parts signantes que s'expressarà per escrit.
- Era denúncia formulada per bèra ua des parts.
- Era impossibilitat susvenguda, legau o materiau, de dar compliment as sues clausules.
- Er incompliment, per quinsevolha des sues parts, des compromissi o obligacions assumits en madeish.
- Es causes generaus establides ena legislacion vigenta.

E en pròva de conformitat, es parts signen aguest convèni per exemplar duplicat e a un solet efècte, en lòc e data remercats en començament.

Er Alcalde der Ajuntament  
de Vielha e Mijaran

Eth President dera  
EMD de Gausac

Deuant men,  
Era Secretària

Juan Antonio Serrano Iglesias

Jesús Ordóñez Jaquet